

清

史

稿

清史稿

列傳

遺逸

太史公伯夷列傳憂憤悲嘆百世下猶想見其人伯夷叔齊扣馬而諫既不能行其志不得已乃遁西山歌采薇痛心疾首豈果自甘餓死哉清初代明平賊順天應人得天下之正古未有也天命既定遺臣逸士猶不惜九死一生以圖再造及事不成雖浮海入山而回天之志終不少衰迄於國亡已數十年呼號奔走逐墜日以終其身至老死不變何其壯歟今爲遺逸傳凡明末遺臣如李清等逸士如李孔昭等分著於篇雖寥寥數十人皆大節凜然足風後世者也至黃宗羲等已見儒林傳魏禧等已見文苑傳餘或分見于孝友及藝術諸傳則當比而觀之以見其全焉

遺逸一

李清

字慎

梁以樟

王世貞

閻爾梅

高麗

鄭與僑

曹元方

莊元辰

王五

李長祥

王正

陸宇燾

江弟

方以智

子中

錢澄之

惲日初

郭金臺

朱之瑜

沈光文

張士京

吳祖錫

李清字心水號映碧興化人天啟辛酉舉人崇禎辛未進士授甯波推官考最擢刑科給事中同日上兩疏一言禦外敵當戰守兼治不當輕言款禦內寇當勦撫並用不當專言撫一言治獄不宜置失入而獨罪失出因論尚書劉之鳳不職狀尋以天旱復疏言此用刑鍛鍊刻深所致語侵尚書甄淑淑遂劾清把持詎鑄級調浙江布政司照磨無何淑敗即家起吏科給事中疾朝臣日競門戶疏言國家門戶有二北門之鎖鑰以三協爲門戶陪京之扃鍵以兩淮爲門戶置此不問而閨堂闕穴長此安底疏入不報京師陷福王建號南京遷工科

都給事中見朝政日壞官方大亂乃疏言大雋未雪凡乘國難以拜官者義將慚慟入地宜急更前轍以圖光復又憤時議以偏安自足抗疏曰昔宋高之南渡也說者謂其病於意足若陛下於今日其何足之有以河洛爲豐沛則恭皇之舊封也爲恭皇所已有而不有則不足以金陵爲長安則高帝之始基也爲高帝所全有而不有則不足臣深望陛下無忘痛恥以此志爲中外倡也儻陛下弛於上則諸臣必逸於下先帝之深讎將安得而復哉且宋之南渡猶走李成擒楊么以靖內制外今則獻獠交熾兩川危於累卵江湖南贛並以警聞北有旣毀之室南無可怡之堂臣竊爲陛下危之疏上報聞而巳有司始訟莊烈帝爲思宗清言廟號同於漢後主禪請易之又請補設太子二王及開國靖難並累朝死諫諸臣或以爲迂歎曰士大夫廉恥喪盡矣不於此時顯微闢幽激發忠義之氣更復何望耶清事兩朝凡三居諫職章奏後先數十上並寢閣不行尋遷大理寺左寺丞遣祀南鎮行甫及杭而南都失守矣乃山問道趨隱松江又渡江寓高郵久乃歸故園杜門不與人事當道屢薦不起凡三十有八年

而歿清忠義蓋出天性莊烈帝之變適在揚州聞之號慟幾絕自是每遇三月十九日必設位以哭嘗曰吾家世受國恩吾以外吏蒙先帝簡擢涖埃未報國亡後守其磴磴有死無二蓋以此也晚著書自娛尤潛心史學爲史論若干卷又刪注南北二史編次南渡錄等書藏於家李模字子木吳縣人天啓乙丑進士授東莞知縣考最入爲御史因劾論中官謫南京國子監典籍福王立封四鎮爲侯伯模上言擁立時陛下不以得位爲利諸臣何敢以定策爲功甚至侯伯之封輕加鎮將夫諸將事先帝未收桑榆之効事陛下未彰汗馬之績方應戴罪何有勳勞使諸將果忠義者必先慰先帝殉國之靈而後可膺陛下延世之賞報聞尋改爲河南道御史馬阮亂政歎曰事無可爲矣即請告不復出杜門里居三十年如一日幼與徐汧爲總角交汧死國事爲恤其家而存其孤不渝舊好年八十卒於家

梁以樟字公秋清苑人與兄以枏弟以桂並知名時號三梁以樟負異才八歲讀書家塾中值壁裂作壁裂歌云壁猛裂龍驚出見者大奇之十六歲補弟子

員受知左光斗崇禎己卯舉鄉試第一明年成進士命試騎射進士皆書生夙不習以樟獨躍馬彎弓矢三發的皆應弦破觀者歎異即授河南太康知縣中原盜起十餘年所在荼毒督撫莫能辦率倡撫議苟且幸無事盜且服且叛而河南比年大旱蝗人相食民益蠱起爲盜人爲以樟危僉都御史史可法以其有經世略獨勸之行抵任探知境內賊凡三十六窟於是練鄉勇修城堡嚴保甲募死士入賊巢伺賊出入嘗夜半馳風雪中帥健兒密擣賊壘賊驚佚禽其渠燬巢而歸居半載境內賊悉平調商邱時李自成犯開封不能破乃東攻歸德以樟嬰城血戰三日夜城陷妻張率家人三十口自焚死事具明史以樟被重創仆亂屍中死復甦商民救之出奔淮上被逮讞請室賊入潼關復渡河東犯京師震動以樟乃從獄中上疏請皇太子撫軍南京輔以重臣假便宜從事係人心倡召豪傑義旅大起勤王兵擇宗室賢才分建要地而重督撫權行方鎮遺意合力拒疏上執政尼之迨出獄而都城陷福王立以樟自德州臨清南下與各郡邑建義文武吏及諸豪士歃血盟人皆感憤流涕受約束待命渡淮

見可法因建議山東河北爲江南藩蔽若無山東河北是無中原江北無中原江北區區江南豈能自守耶今宜於河南北山東設三大鎮倣唐節度使宋經制招討使之制以大臣文武兼資者爲之寬其文法使自爲戰守而閣部大治兵居中馭之又言北方人心向順宜及時撫爲我用否則忠者不能支黠者反戈相向矣前後奏記百數十而馬士英專政貨鬻官爵用逆黨阮大鍼爲兵部尙書競立門戶斥忠讜之士君臣日夜酣樂左良玉高傑劉澤清等各擁兵跋扈莫能制以樟知事不可爲憤鬱成疾辭去可法仍舉以樟爲兵部職方司主事經理開歸未幾揚州破可法死南都相繼潰以樟遂與以相遜跡實應之霞湖買田數十畝躬耕自給清初召用勝國諸臣以樟年纔三十七朝貴致書勸駕不應自築忍冬軒日與張璠孫爾靜講學其中四方之士若閻爾梅王猷定劉純學崔千城僧松隱暨其鄉人王世德父子時時過以樟劇飲慷慨激昂繼以涕泣晚年偕喬山塵陳鉅朱克生劉中柱結文字社康熙四年七月十五日端坐作論學數百言擲筆而卒年五十八世德之子潔源集其理學經濟諸書

及詩古文合爲一編曰梁鶴林先生全書今傳世者惟叩否詩集而已世德字克承自號霜皋北平人少襲錦衣衛指揮僉事北都陷拔刀將引決爲僕所奪妻魏已率諸婦女赴井死遂易僧服與以樟偕隱嘗憤野史誣罔不可傳信後世歎歎扼腕作崇禎遺錄一卷自序之康熙間修明史有司錄其副本上史館三十二年卒年八十有一子源以手藥殉葬

閻爾梅字用卿號古古沛縣人崇禎庚午舉人李自成陷北京爾梅上書請兵北伐並盡散家財結死士爲前驅自成黨武懷至沛屢使招爾梅以碎牒大罵下獄懷敗乃免赴史可法之聘參軍事首勸渡河復山東不聽時高傑爲許定國所殺河南大亂爾梅又說可法西行鎮撫之傑部將約束待命可法爲設提督統其衆而自退保揚州爾梅力阻之請開幕府徐州號召河南北義勇得以一成一旅規畫中原又請空名告身數百紙乘時布發視忠義爲鼓勵俾逋寇叛帥不得以踰時渙散少有睥睨策皆不行遂貽以書而去及可法殉節爾梅走淮安就劉澤清田仰畫戰守策復不聽師入淮爾梅率河北壯士伏城外衆

懼阻羽士陶萬明特庇之巡撫趙福星以書招爾梅痛哭謝之乃散其衆遁海上祝髮稱蹈東和尚復走山東聯絡四方魁傑謀再舉又至河南至京師以山東事發被捕下濟南獄脫走還沛名捕急弟爾璽姪御九皆就逮妻妾同自殺爾梅乃託死夜遁變名翁深字藏若厯遊楚蜀秦晉九省過關中與王宏撰等往還北至榆林從寧夏入蘭州凡十年獄解始還未幾爲仇家所攀復出亡巽鼎孳救之得免北謁思陵又東出榆關還京會顧亭林復遊塞外至太原訪傅山結歲寒之盟爾梅久奔走厯艱險不少阻後見大勢已去知不可爲乃還沛寄於酒醉則罵座常慨然曰吾先世未有仕者國亡破家爲報仇天下震動事雖終不成疾風勁草布衣之雄足矣遂高歌起舞泣數行下居數歲卒年七十有七爾梅博學善詩有白香山人集萬壽祺字介若世稱年少先生徐州人與爾梅同郡又同歲生同舉鄉試志節皆同既同舉事南都破江以南義師雲起沈自炳戴之俸錢邦芭起陳湖黃家瑞陳子龍起泖吳易起笠澤皆與會師謀恢復兵潰壽祺被執不屈將及難有陰救之者囚繫月餘得脫乃渡江歸隱築

室浦西妻徐子睿灌園以自給髡首被僧衣自稱明志道人沙門慧壽而飲酒
食肉如故時渡江而南訪知舊弔故壘遺民故老過淮陰者亦輒造草堂流連
歌哭或淹留旬月雖隱居固未嘗一日忘世也順治九年卒壽祺善詩文書畫
旁及琴劍棋曲雕刻刺繡亦靡弗工妙爾梅論有明一代書推爲第一著有隰
西草堂集初爾梅壽祺同謀舉事一起江北一起江南先後相呼應及事敗爾
梅出走思得一當壽祺留江淮觀世變不幸先死爾梅獨奔走三十餘年亦終
無所就後世稱徐州二遺民常爲之太息云

鄭與僑字惠人號確菴濟甯人五歲父歿母張以祖遺田讓之仲獨取遺書一
篋授僑曰兒讀此可飽也與僑發奮力學崇禎丙子舉於鄉時流寇充斥山左
與僑以濟甯爲漕艘咽喉地倡義與城守張世臣舉人孟瑄併力殺賊城賴以
完有賊郭陞者將至濟甯州吏議迎款屬與僑草表力拒乃止及賊至與僑率
鄉人殲之遂徙家淮陽史可法方開府淮上聞與僑名奏爲儀真令而吏部以
其前守濟甯功改除揚州府推官揚州爲興平伯高傑列藩地其將卒多驕橫

稍不當意抽刀刺人與僑悉裁之以法巡按御史何綸薦以推官監江海軍駐通州江南失守與僑奉母之武林總督張存仁經略洪承疇奇其才欲官之皆謝不起後歸濟上立社教授生徒絕口不談時事嘗徧遊秦晉川蜀荆楚吳越諸勝著有確菴稿卅照集爭光集濟甯遺事秦邊記要等書卒年八十有四自爲壙誌

曹元方字介皇海鹽人父履泰明兵部侍郎以忠直著元方崇禎癸未進士南京建號授常熟知縣時大學士馬士英擅國政有薦元方署職方司事者士英亦藉元方名冀往謁附己元方訖不往上疏言願遵定制補外吏語侵士英士英怒卒與令常熟常熟爲吳中煩劇邑最當金陵草創所在兵與民交狃無寧晷元方措兵餉惜民力俱帖然邑稱治金陵敗棄官歸履泰先獲譴謫戍亦適歸父子相謂於義不可宴然以居元方先變姓名問道入閩至建甯謁唐王即授吏部文選司主事進驗封司郎中頃之履泰亦由海道至即授太常卿晉兵部右侍郎父子俱以忠義激發間關來一時咸偉之當是時鄭芝龍久以桀寇

內附崇其秩號姑息爲養驕至是益甚志叵測元方抗疏自請出視江上師聞封守欲從外爲重內計得召對加御史銜賜白金揮涕以行至浦城則江上潰兵接踵狼狽下元方倉卒走計後圖履泰從唐王趨贛州遇兵投身崖石下絕復甦昇至僧舍輾轉至浦城父子得相見履泰疾甚先歸旋卒於家元方聞乃亟歸微服挈母及妻子行寄食旅舍中久之事稍定卜居硤石卹築草堂自號耘庵以老卒年八十有二

莊元辰字起貞晚字頑菴鄞人學者稱漢曉先生賦性嚴凝不隨人唯阿崇禎丁丑進士授南京太常博士甲申之變一日七至中樞史可法之門促以勤王福王立議推科臣總憲劉宗周掌科章正宸皆舉元辰爲首而馬士英密遣私人致意曰博士曷不持門下刺上謁相公掌科必無他屬峻拒之中旨僅授刑部主事已而阮大鍼欲興同文之獄元辰曰禍將烈矣遽行未幾而留都亡錢肅樂之起事也元辰破家輸餉時降臣謝三寶爲王之仁所脅以餉自贖及肅樂與之仁赴江上三寶潛招兵衆疑之明經王家勤謂肅樂曰浙東沿海皆可

以舟師達鹽官倘彼乘風而渡列城且立潰矣非分兵留守不可肅樂曰是無以易吾莊公者於是共推元辰任城守事分兵千人屬之以四明驛爲幕府家勤及林時躍參其事元辰日耀兵巡諸堞里人呼爲城門軍三寶不敢動乃迎魯王於天台鄭始解嚴管吏科都給事中遷太常卿上疏言殿下大誓未雪舉兵以來將士宣勞於外編氓殫藏於內臥薪嘗胆之不遑而數月來頗安逸樂釜魚幕燕撫事增憂則晏安何可懷也敵在門庭朝不及夕有深宮養優之心安得有前席借箸之事則蒙蔽何可滋也天下安危託命將相今左右之人頗能內承色笑則事權何可移也五等崇封有如探囊有爲昔時佐命元臣所不能得者則恩膏何可濫也陛下試念兩都黍離麥秀之悲則居處必不安試念孝陵長陵銅駝荆棘之慘則對越必不安試念青宮二王之辱則撫王子何以爲情試念江干將士列邦生民之困則衣食可以俱廢疏入報聞已又言中旨用人之非累有封駁王不能用時三寶資緣居要而馬士英又至元辰言士英不斬國事必不可爲貽書同官黃宗羲林時對云蕞爾氣象似惟恐其不速盡

者區區憂憤無事不痛心疾首以致咳嗽纏綿形容骨立願得以微罪成其山野遂乞休未幾大兵東下乃狂走深山中朝夕野哭元辰故美鬚眉顧盼落落至是失其面目巾服似頭陀一日數徙莫知所止山中人亦不復識忽有老婦呼其小字曰子非念四郎邪因歎曰吾晦迹未深奈何順治四年疽發背戒勿藥曰吾死已晚然及今死猶可遂卒王玉藻字質夫江都人崇禎癸未進士授慈溪知縣少詹項煜以從逆亡命玉藻及慈民馮元颺均出其門遂匿於馮氏慈人斃煜於水玉藻置不問有明士習重閭誼或以爲過玉藻曰吾豈能爲向雄之待鍾會哉夫君臣之與師友果孰重聞者悚然金陵破魯王監國玉藻乃與沈宸荃起兵督御史仍行縣復募義勇請赴江上自効略謂今恃以自保者惟錢唐一江待北兵渡江而後禦曷若禦之於未渡之先臣願以身先之乃解縣事以兵科都給事往軍前時駐兵江上者有方國安王之仁孫嘉績熊汝霖章正宸鄭道謙錢肅樂沈光文陳潛夫黃宗義咸各自爲軍兵餉交訐莫敢先進旣不予玉藻以餉復陳劃地分餉又不聽玉藻乃力請還朝旣入諫垣上封

事十餘略謂北兵之可畏者在勇而我軍之可慮者在怯怯由於驕兵驕由於將驕今統兵之將無汗馬之勞輒博五等之封安得不敗以驕心驕則畏戰非稍加裁抑恐無以戢其驕陵之氣又謂宜用海師窺吳淞以分杭州北兵之勢又劉宗周祁彪佳諸臣宜加褒忠之典以是不爲諸臣所喜乃力求罷職時元辰爲太常固乞留之謂古人折檻旌直今令直臣去國豈國家之福玉藻感其言供職如初浙東再破玉藻追魯王蹕弗及自投於池水涸不得死乃以黃冠遜於剡溪資糧俱盡采野葛爲食妻李遠東巡撫植女知書明大義在浙右時屢脫簪珥佐軍興偕入剡溪命二子方歧方疑拾墜樵不以窮阨易操適四明山寨競起義軍以書致玉藻玉藻思乘間入舟山爲偵騎所遏不果往每臨流讀所作詩輒激厲慷慨仰天起舞或朝夕悲歌與門人熊亦方相和答繼亦方以歟死玉藻歸隱北湖誓不易衣去髮作絕詞以逝遺命不冠而歛

李長祥字研齋達州人崇禎癸未進士初以諸生練鄉勇助城守後選庶吉士吏部薦備將帥之選或曰天子果用公計安出歎曰不見孫白谷往事乎今惟

有請便宜行事雖有金牌亦不受進止平賊後囚首闕下受斧鉞耳聞者咋舌
賊日逼上疏請急令大臣輔太子出鎮津門以提調勤王兵不果行而京師潰
爲賊所掠乘間南奔福王立改監察御史巡浙鹽魯王監國加右僉都御史督
師西行而江上師又潰魯王航海去長祥以餘衆結寨上虞之東山時浙江諸
寨林立四出募餉居民苦之獨長祥與張煌言王翊三營且屯且耕井邑不擾
監軍鄧人華夏者爲之聯絡布置請引舟山之兵連大蘭諸寨以定鄞慈五縣
因下姚江會師曹娥台僞山諸寨以下西陵會議奉長祥爲盟主刻期將集而
爲降紳謝三賓所發引兵來攻前軍張有功被執死中軍與百夫長十二人期
以次日縛長祥爲獻晨起十二人忽自相語奈何殺忠臣折矢扣刃偕誓而遁
長祥匿丐人舟中入紹興城居數日事益急復遷至奉化依平西伯朝先朝先
亦蜀人得其助復合衆於夏蓋山督兵部左侍郎請合朝先之衆聯絡沿海以
爲舟山衝張名振忌之襲殺朝先長祥僅免舟山破亡命江淮間總督陳錦捕
得之安置江甯未幾乘守者之怠逸去由吳門渡秦郵奔河北遍歷宣府大同

復南下百粵晚歲始還居毘陵築讀易堂以老王正中字仲搆保定人崇禎丁丑進士魯王監國以兵部職方司主事攝餘姚縣事時義軍猝起市魁里正得一割付輒入民舍括金帛郡縣不敢誰何正中既視事令各營取餉必經縣否則以盜論總兵陳梧渡海掠餘姚正中遣民兵擊殺之諸營大譁責正中擅殺大將黃宗義言於監國曰梧借喪亂以濟其私致犯衆怒是賊也正中守土當爲國保民何罪之有議乃息張國柱田仰荆本徹各率所部過姚江舳艫蔽空而下以正中嚴備不敢犯皆帖帖趣行國柱後從定海入縱兵焚掠正中單騎入其軍呵止之國柱迄不得逞尋擢監察御史諸軍從浙西來會一聽約束衆倚之若嚴城焉尋以株連繫獄論死獄中有閩人柯仲爛者精星象正中欲從受業援黃霸從夏侯勝授經事爲說數年講習不忘洞悉天官律呂度數諸書復從黃宗義學壬遁孤虛之術宗義歎曰傳吾絕學者仲搆一人耳遂造監國魯元年丙戌大統厯以進浙東亡避竄山中貧不能自存傍鑑湖佃田五畝佐以醫卜自給康熙六年卒年六十九著有周易註律書詳註董守諭字次公鄴

縣人舉人魯王監國召爲戶部貴州司主事時熊汝霖孫嘉績首事起兵然皆書生不知調度乃迎方國安王之仁授之軍政凡原設營兵衛軍俱隸之孫熊所統惟召募數百人方王兵旣盛反惡當國者有所參決因而分餉分地之議起分餉者正兵食正餉田賦之出也方王主之義兵食義餉勸捐無名之徵也熊係諸軍主之分地者某正兵支某邑正餉某義兵支某邑義餉也魯王令廷臣集議方王司餉者皆至殿陛譁爭守諭曰諸君起義旅咫尺天威不守朝廷法乎乃稍退守諭又進曰義餉有名無實以之饋義兵必不繼即使能繼誰爲管庫今請以一切稅供悉歸戶部計兵而後授餉數地之遠近酌給之後先則兵不絀於食而餉可以時給也方王雖不從然所議正無以難也之仁請收漁船稅守諭曰今日所恃者人心耳漁戶已辦漁丁稅矣若再苛求民不堪命人心一搖國何以立久之又請行稅人法請塞金錢湖爲田官賣大戶祀田贍軍三疏皆下部議兵士露刃以待覆守諭力持不可之仁大怒謂行朝大臣不敢裁量幕府戶曹小臣敢爾阻大事邪檄召守諭將殺之魯王不能禁令且避守

諭慷慨對曰司餉守正臣分也生殺出主上武寧雖悍將何爲者臣任死王前聽武寧以臣血濺丹墀可耳於是舉朝忿怒曰之仁反邪何敢無王命而害餉臣之仁乃止明年莊烈帝大祥守諭請謁朝堂哭三軍縞素一日遷經筵日講官兼理餉事魯王航海守諭不及從遂跡荒郊旋卒著有蘭集

陸宇燁字周明鄞縣人諸生慷慨尙氣節時有弟子訟其師師不得直宇燁詣文廟慟哭伐鼓卒直其師而後止明亡嘗與黃宗羲謀舉事其所與計畫者皆四方知名士其城西田舍複壁柳車雜賓死友計收喜事乃益甚江湖間多傳其姓名以爲異人南都破而東師起宇燁毀家紆餉翁洲又破宇燁捐金與謀者令訪死事消息張肯堂之孫以俘至亟治案牘入獄視之語其弟宇燦使爲脫繫董志寧之喪在海上宇燁致而葬之旋爲降卒所誣捕入省獄獄具宇燁無所註誤脫械出門未至館而卒宇燁以好事盡其家產室中所有惟草薦敗絮及故書數百卷計聞家人整理其室得布囊於亂書之下發而視之則赫然人頭也宇燦識其面目捧之而泣曰此故少司馬篤庵王公頭也初司馬兵敗

梟城闕宇燹思收葬之每徘徊其下一日見暗中有叩首而去者跡之走入破
室宇燹曰子何人其人曰余毛明山曾以卒伍事司馬今不勝故主之感耳宇
燹相與流涕而詣江子雲計所以收其頭者子雲名漢錢肅樂部將也失勢家
居會稽陽競渡游人雜沓子雲紅筭握刀從十餘人登城遨戲至梟頭所問守
卒曰孰戴此頭也者卒以司馬對子雲佯怒曰嘻吾怨家也亦有是日乎拔刀
擊之繩斷墮地宇燹明山已豫立城下方是時龍舟噪甚人無回而易視者宇
燹以身蔽明山抬頭雜儔人而去宇燹祀之書室蓋十二年矣而家人無知者
至是宇燹始瘞之宇燹宇燹第五弟字春明負才自喜俯視一切宇燹風格稜
稜不可犯而宇燹稍濟之以和故世人親之如夏日冬日之分然其刻意厲行
雖嘲笑皆歸名節則一也丙戌後棄諸生與諸遺民游荒亭木末時聞野哭同
里秀才杜懋俊仗義死難藏其遺孤桐城方授避地來鄧宇燹館之湖樓中授
卒宇燹經紀其喪收拾遺文以致其家性嗜異書晚年家既貧不能具寫官乃
手鈔之瀕病不倦從子官山左令其訪東萊趙士喆遺書垂殁尙以其書未至

爲恨自棄諸生卽練衣蔬食叢林以爲佞佛爭勸之披緇字燦笑不答及遺命
不作佛事衆始罷然卒年六十六著觀日堂集八卷漢錢唐人爲肅樂所倚恃
授以都督僉事總兵官師至閩幾下福州漢功爲多侍郎馮景第之乞師日本
也請與偕行及歸漢曰東師必不出也已而果然肅樂旣卒漢侍母居鄞種蔬
自給四壁無長物惟餘肅樂所贈寶刀一而已每語及肅樂則淚淋淋下抑鬱
終

方以智字密之桐城人父孔炤明湖廣巡撫爲楊嗣昌劾下獄以智懷血疏訟
寃得釋事具明史以智崇禎庚辰進士授檢討會李自成破潼關范景文疏薦
以智召對德政殿語中機要上撫几稱善以忤執政意不果用京師陷以智哭
臨殯宮至東華門被執加刑毒兩髀骨見不屈賊敗南奔值馬阮亂政修怨欲
殺之遂流離嶺表自作序篇上述祖德下表隱志變姓名賣藥市中桂王稱號
肇慶以與推戴功擢右中允扈王幸梧州擢侍講學士拜禮部侍郎東閣大學
士旋罷相固稱疾屢詔不起嘗曰吾歸則負君出則負親吾其緇乎行至平樂

被繫其帥欲降之左置官服右白刃惟所擇以智趨右帥更加禮敬始聽爲僧
更名宏智字無可別號藥地康熙十年赴吉安拜文信國墓道卒其閉關高坐
時也友人錢澄之亦客金陵遇故中官爲僧者問以智澄之曰君豈曾識耶曰
非也昔侍先皇一日朝罷上忽歎曰求忠臣必於孝子如是者再某跪請故上
曰早御經筵有講官父巡撫河南坐失機問大辟某薰衣飾容止如常時不孝
若此能爲忠乎聞新進士方以智父亦繫獄日號泣持疏求救此亦人子也言
訖復歎俄釋孔炤而辟河南巡撫外廷亦知其故乎澄之述其語告以智以智
伏地哭失聲以智生有異稟年十五羣經子史略能背誦博涉多通自天文輿
地禮樂律數聲音文字書畫醫藥技勇之屬皆能考其源流析其旨趣著書數
十萬言惟通雅物理小識二書盛行於世子中德字田伯著古事比以智構馬
阮之難中德年十三擢登聞鼓訟父冤父山亡偕諸弟徒步追從中通字位白
精算術著數度衍見疇人傳中履字素伯幼隨父於方外備嘗險阻著古今釋
疑

錢澄之字飲光原名秉鐙桐城人少以名節自勵有御史巡按至皖盛儀從謁孔子廟諸生迎迓門外澄之忽前扳車御史大駭止車因抗聲數其穢行御史故閹黨方自幸脫逆案內懼不敢究其事澄之以此名聞是時復社幾社始興比郡中主壇坫者宣城沈壽民池陽吳應箕桐城則澄之及方以智而澄之又與陳子龍夏允彝輩聯雲龍社以接武東林澄之體貌偉然好飲酒縱談經世之略嘗思冒危難立功名阮大鍼既柄用刊章捕治黨人澄之先避吳中妻方赴水死事具明史於是亡命走浙閩入粵崎嶇險絕猶數從鋒鏑間支持名義不少屈黃道周薦諸唐王授吉安府推官改延平府桂王時擢禮部主事特試授翰林院庶吉士兼誥敕撰文指陳皆切時弊忌者衆乃乞假間道歸里結廬先人墓旁環廬皆田也自號曰田間著田間詩學易學澄之嘗問易道周依京房邵雍說究極數學後乃兼求義理其治詩遵用小序首句於名物訓詁山川地理尤詳自謂著易詩成思所以竊二經者而得莊周屈原乃復著莊屈合詁蓋澄之生值末季離憂抑鬱無所洩一寓之於言故以莊繼易以屈繼詩也又

有藏山閣詩文集卒年八十二

惲日初字仲升號遜菴武進人崇禎癸酉副榜久留京師應詔上備邊五策不報知時事不可爲乃歸隱天台山兩京亡唐王立福州魯王亦監國紹興吏部侍郎姜垓薦日初知兵魯王遣使聘之固辭不起大兵下浙避走福州福州破走廣州廣州復破乃祝髮爲浮圖復至建陽是時唐王被執死魯王亦敗走海外湖廣何騰蛟江西楊廷麟等皆前後殺滅而明遺臣尙擁殘旅遙奉永曆金壇人王祈聚衆入建甯屬縣多響應日初曰建甯入閩門戶能守則諸郡安然不扼仙霞關建甯終不守也欲取仙霞宜先取蒲城乃遣長子禎隨副將謝南雲先趨蒲城失利皆死而御史徐雲兵連入數州縣銳甚日初說令夜入蒲城自督兵繼進會大雷雨人馬衝泥淖行不能速軍遂潰建甯被圍王使兵部尙書揭重熙赴援日初上書請逕取蒲城斷仙霞嶺餉道徐與圍中諸將夾擊之重熙巡至邵武不能進建甯遂破王祈力戰死日初收殘卒走廣信尋入封禁山中數日糧盡喟然曰天下事壞散已數十年不可救正然莊烈帝殉社稷薄

海茹痛小臣愚妄謂即此可延天命今乃至此徒毒百姓何益遂散衆獨行歸
常州久之張煌言與鄭成功軍薄江甯敗走訛傳張弟鳳翼乃日初門人從師
匿縣官將收捕日初色如常曰吾當死久矣既而事解卒年七十有八少與楊
廷樞等交於百氏無所不窺尤喜宋儒書及從劉宗周游學益進常上書申救
義聲震天下丙戌後累至山陰哭祭爲之行狀近十萬言晚服浮圖服而言學
者多宗之無錫高世泰重葺東林書院日初與同志習禮其間知常州府駱鍾
泰屢求見不納去官後與一見言中庸要領喜而去曰不圖今日得聆大儒緒
論也次子桓在建甯被掠不知所終少子格字壽平見藝術傳

郭金臺字幼隗湘潭人本姓陳氏名湜年十五遭家難賴中表郭氏卵翼得脫
遂爲繼弱冠有聲黉序間萬厯間兩中副車崇禎朝屢以名薦不起例授官亦
不拜既南渡隆武鄉試登賢書督師何騰蛟論薦授職方郎中再起監軍僉事
有司敦迫皆以母老病辭不就避跡山中然於時事多所論列一二枕戈泣血
之士崎嶇嶺海經營措置不遺餘力當是時潰卒猖獗積屍盈野百里無人煙

金臺請於督師命偏裨主團練力率鄉勇鍛矛戟峙芻糗鄉人全活者以數萬計清初當局特疏薦於朝力請得免晚授徒衡山深衣幅巾足不履戶外絕口不談世事惟論列當時殉難諸人輒歔歔流涕康熙十五年以疾卒於家年六十有七自題其墓曰遺民郭某之墓著有石村詩文集五經駢語博物彙編朱之瑜字魯瑱號舜水餘姚人寄籍松江少有志概九歲喪父哀毀踰禮及長精研六經特通毛詩崇禎末以諸生兩奉徵辟不就福王建號江南召授江西按察司副使兼兵部職方司郎中監方國安軍之瑜力辭臺省劾偃蹇不奉詔將逮捕乃走避舟山與經略王翊相締結密謀恢復渡海至日本思乞師魯王監國累徵辟皆不就又赴安南見國王强令拜不爲屈轉敬禮之復至日本時舟山旣失之瑜師友擁兵者如朱永祐吳鍾巒等皆已死節乃決蹈海全節之志遂留寓長崎日人安東守約等師事之束脩敬養始終不衰日本水戶侯源光國厚禮延聘待以賓師之瑜慨然赴焉每引見談論依經守義曲盡忠告善道之意教授學者循循不倦日人重之瑜禮養備至特于壽日設養老之禮奉

几杖以祝又爲製明室衣冠使服之並欲爲起居第之瑜再辭曰吾藉上公眷顧孤蹤海外得養志守節而保明室衣冠感莫大焉吾祖宗墳墓久爲發掘每念及此五內慘烈若豐屋而安居豈我志乎乃止之瑜爲日人作學宮圖說商榷古今剖微索隱使梓人依其圖而以木模焉棟梁榫椽莫不悉備而殿堂結構之法梓人所不能通曉者親指授之度量分寸湊離機巧教喻縝密經歲而畢文廟啟聖宮明倫堂尊經閣學舍進賢樓廊廡射圃門戶墻垣皆極精巧又造古祭器先作古升古尺揣其稱勝作簠簋籩豆登鋤之屬如周廟欝器唐宋以來圖雖存而制莫傳乃依圖攷古研覈其法巧思默契指畫精到授之工師或未洞達復爲揣輕重定尺寸關機運動教之經年不厭煩數卒成之於是率儒學生習釋奠禮改定儀注詳明禮節學者皆通其梗概日人文教爲之彬彬焉之瑜居日本二十餘年年八十三卒葬於日本長崎瑞龍山麓日人諡曰文恭先生立祠祀之並護其墓至今不衰之瑜嚴毅剛直動必以禮平居不苟言笑唯言及國難常切齒流涕魯王敕書奉持隨身未嘗示人歿後始出人皆服

其深密謹厚云著有文集二十五卷釋奠儀注一卷陽九述略一卷安南供役紀事一卷

沈光文字文開一字斯菴鄭人少以明經貢太學福王授太常博士浮海至長垣晉工部郎閩師潰而北冠從不及聞粵中建號乃走肇慶累遷太僕卿由潮陽航海至金門閩督李率泰方招徠故國遺臣密遣使以書幣招之光文焚書返幣知粵事不可支卜居於泉州海口浮家泛宅忽颶風大作舟人失維飄泊至臺灣時鄭成功尙未至而臺灣爲荷蘭所據光文受一廛以居與中土音耗隔絕成功克臺灣知光文在大喜以賓禮見時海上諸遺老多依成功入臺光文與握手相勞苦成功致廩餼且以田宅贍之成功卒子錦嗣改父之臣與政軍亦日削光文作賦諷之幾不測乃變服爲浮屠逃入臺北鄧結茅羅漢門山中以居山旁有伽溜灣者番社也光文教授生徒自給不足則濟以醫歎曰吾二十載飄零絕島棄墳墓不顧者不過欲完髮以見先皇帝於地下耳而卒不克命也夫已而錦卒諸鄭復禮之如故康熙癸丑年王師下臺灣閩督姚啟聖

招之光文辭啟聖貽書問訊曰管甯無恙且許遣人送歸鄭會啟聖卒不果而諸羅令李麟光賢者也爲粟肉之繼旬日一候門下時耆宿已盡而寓公漸集乃與宛陵韓文琦關中趙行可無錫華袞鄭廷桂榕城林奕丹山陽宗城螺陽王際慧等結詩社所稱福臺新咏者也尋卒於諸羅陳士京字佛莊先世本奉化朱氏遷鄭改姓陳熊汝霖薦授職方司郎中監三衢總兵陳謙軍謙使閩偕行而唐魯方爭頒詔事謙死遂遜之海上鄭芝龍聞名令與其子成功遊芝龍以閩降成功不肯從異軍特起士京實贊之已而汝霖奉魯王至復以公義說成功始致寓公之敬會魯王上表粵中成功亦欲啟事於粵使士京往加都御史歸魯王入浙特留閩與成功相結以爲後圖成功盛以恢復自任寶禮遺臣其最致敬者尙書盧若騰侍郎王忠孝都御史章朝薦及徐孚遠沈光文與士京數人而已久之見海師無功粵事亦日壞乃築鹿石山房於鼓浪嶼中感物賦詩以自遣尋卒

吳祖錫字佩遠吳江人崇禎壬午副貢時中原大亂料京師必危預謀勤王欲

身任浙西以浙東屬之許都約未定而變作故鎮臣陳洪範隨王師下江南與有舊自言其降出於不得已而以奇策告祖錫立出遺產四萬金畀之已而難髮令下遽委之去改名鉏字稽田從陳子龍徐孚遠謀恢復偵事杭州爲仇家縛送江甯羈係獄中復髡而縱之魯王授職方郎中桂王亦官之如魯仍往來吳越間副將馮源淮駐軍嘉興乃與結納冀有所爲其部屬董某司詞察馮耳目也亦故與厚善比孚遠歸自海外有所謀密館之事稍聞於馮馮遣董詣問祖錫遽前握其手曰徐公在此若欲見之乎董驚曰徐公果在此願肯令我見耶即引見董叩頭泣下道其嚮慕矢不相負因以譌言報馮而陰遣戈船衛孚遠浮海去海師入江祖錫質導之且連歲在金陵隱爲之助乃復遭刊章事解志不稍挫將詣滇南而先之鄖陽時鄖陽十三營尙保殘寨乃勸出師撓楚以救滇顧十三營已疲敝不能用其策也桂王旣入緬甸思追從道阻不得達復返吳游中州更由秦入楚卒無所遇康熙己未客膠州大竹山鬱鬱廢所聘會懷宗忌日慟哭嘔血死遺命藥葬山中年六十有二距明亡已三十有五年矣

凡明末三王遺臣逸士其初或起義或言事各有所謀其後或蹈海或居夷志不少沮皆先後云亡及祖錫死徐枋爲之傳曰自吳子歿而天下絕援溺之望亦可悲矣故以附於明末遺臣之末

清史稿

列傳

遺逸

李孔昭

劉軍
繼哲
南島

劉永錫

之

徐枋

聖殿
武器
質

李天福

顧柔謙

· 组 · 展

冒寒

陳大猷

祁班孫

九
和
興

汪諷

余增遠

傅山

7
8

費密

王宏撰

杜濬

● ●

郭都賢

海
花
堂

李世熊

談遷

李孔昭字光四薊州人性孤介平居教授生徒倡明理學崇禎十五年進士見世事日非不赴廷對以所給牌坊銀留助軍餼奉母隱盤山中躬執樵採自給母病刲股療之北都陷素服哭於野者三載薊州城破妻王殉難死終身不再

娶形蹟數易人無識者清初詔求遺老撫按交章薦不出一日當道遣吏持書幣往遇負薪者呼而問之曰若識李進士耶負薪者詰得其故以手遙指而去吏至其室虛矣鄰叟曰汝面失之向所負薪者李進士也後屢物色之卒不得時有某孝廉當上公車輒止不行曰吾出郭門一步何面目見李光四乎會值邑中方興役按戶簽夫驅孔昭孔昭曰吾力不能任願出資以代吏持去閱數日大學士杜立德聞孔昭在邑急往候之吏聞趨謝罪孔昭曰此間不知有李進士若勿誤也由是踪跡愈密或黃冠或儒服見者甚稀惟寶坻單者昌崔周田劉繼甯皆高士與之友善往來無虛歲者昌字蔚起才名埒孔昭早餒於庠入清不復應試杜立德招之不能致獨與孔昭徜徉田野間悲歌慨憤有所作輒焚之不以示人竟以憂死周田字錫齡順治中充歲貢不與試建一樓貯古本書及金石刻萬卷日吟嘯其中嘗過盤山與孔昭坐林石間相笑語孔昭亦時下榻於其家周田命其子執弟子禮且迎孔昭母事之如所生繼寧字兌菴少負義氣有古俠士風嘗出重金贖難女二爲之擇配歲饑煮粥食餓者視周

田如手足有緩急恆資之周田亦弗謝也晚年爲子擇師遊盤山踪跡孔昭得之邀至其家令其三子從受業暇則與周田衆譙歌呼以爲樂然每一念母雖深夜必馳歸弗能禁也晚好陶詩因又自號潛翁一日爲門人講孟子盡心章曰此傳心法也言訖而卒其弟子私諡曰安節先生

劉永錫字欽爾號贍菴魏縣人崇禎乙亥舉人官長洲教諭南都敗率妻栗隱居相城大吏造其室欲強之出永錫袒裊疾視曰我中原男子年二十渡漳河登大缶躍馬鳴鞘兩河豪傑誰不知我者欲見辱耶取壁上劍自刎門下士抱持之得解謂其妻曰彼再至我與若立決矣皆裂尺帛握之尋移居陽城湖濱與妻及子臨女貞織席以食市中見永錫携席至皆呼席先生食不繼時不舉火有遺之粟者非其人不受益困憊其女已許字未嫁亂後恐遭辱絕粒死其妻哭之成疾亦死其童僕遇水災乏食相繼餓死或散走有老奴從魏縣來勸之歸曰室廬故在也永錫曰我非不欲歸然昔奉君命來義不可離此一步命其子與婦攜老奴還里曰祖宗邱墓責在汝輩之去時歲荒得食愈艱每雜糠

屹作飯臨既歸思父不置假貸得百金馳獻中途馬驚墮地死永錫容貌甚偉至是毀形骨立既自悼無家買一破船往來江湖間嘗泛舟中流鼓枻而歌曰邇彼中流兮采其荇矣呼君與父兮莫之應矣身爲餓夫兮天所命矣中心殷殷兮涕斯迸矣又歌曰白日墮兮野荒荒逐曷雁兮侶牛羊壯士何心兮歸故鄉歌聲悲烈聞者哀之尙書錢謙益念其窮招之往永錫曰尙書爲黨魁受主眷枚卜時天子期以伊傅彼豈忘之邪卻不往卒窮餓至不能起一夕大呼烈皇帝者三遂卒時順治十一年秋也弟子長洲徐晟陳三島友人常熟陸泓經紀其喪葬之於虎邱山塘以妻女附之彭之燦字了凡蠡縣諸生甲申後攜妻寓饒陽作村塾師未幾妻子相繼死至蘇門與孫奇遇遊然性不諧俗愛靜坐有人延於家以市糶輒避去嘗渡河南遊韓鼎業爲館之僧舍年餘又棄去獨擔瓢笠圖書徧遊嵩少王屋諸名勝在九山絕粒數日奇遇挽之夏峯勸歸老先人墓旁之燦曰某山門時已誓告先隴不再返不能蹈東海入西山而死即溝壑道路無恨也順治十五年六月竟死嘯臺東北石柱下奇遇爲鐫石記其

事立墓上曰餓夫之墓之煤與容城張果中西華理鬯和並稱蘇門三賢

徐枋字昭法長洲人父汧明少詹事殉國難事具明史枋崇禎壬午舉人汧殉國時枋欲從死汧曰吾不可以不死若長爲農夫以沒世可也自是遁跡山中布衣草履終身不入城市及游靈巖山愛其曠遠下澗上居之老焉枋與宣城沈壽民嘉興巢鳴盛稱海內三遺民枋書法孫過庭畫宗巨然間法倪黃自署秦餘山人嘗寄靈芝一幀於王士禎士禎與金孝章畫梅王玠草書作齋中三詠以記之然性岐介鍵戶勿與人接睢州湯斌巡撫江南屏騶從往訪之枋避不見斌登其堂堅坐移晷爲誦白駒之詩周覽太息而去川湖總督蔡毓榮自荊州致書求其畫枋答書而反幣竟不爲作曰明府是殷荊州吾薄顧長康不爲耳所往來惟沈壽民與萊陽姜垓同里楊無咎門人吳江潘耒及南嶽僧洪儲而已家貧絕糧耐饑寒不受人一絲一粟洪儲時其急而周之枋曰此世外清淨食也無不受豢一驢通人意日用間有所需則以所作書畫卷置簾於驢背驅之驢獨行及城闔而止不闌入一步見者爭越之曰高士驢至矣亟取卷

以日用所需物如其指備而納諸簾櫺卽負以返以爲常卒年七十三時商邱宋榮撫吳枋預戒曰宋中丞甚知我若我死勿受其賻也榮果使人贈棺槨資如枋命終不受卒以貧不能葬一日有高士從武林來弔請任窆窆其人亦貧而特工篆隸乃賃居郡中鬻字以庀葬具紙得百錢積二年乃克葬枋於青芝山下而以羨歸其家語之曰吾欲稱貸富家懼先生吐之故勞吾腕知先生所心許也葬畢卽去不言名氏或有識之者曰此山陰戴易也易字南枝少從劉宗周學游吳門年七十餘矣有六子不受其養獨攜一子及殘書百卷自隨其售字也銖積寸累不妄費一錢一蒼頭饑不能忍輒逃去己寄食僧舍中語及枋必流涕嘗浮七里瀨登嚴子陵釣臺賦詩且歌且泣或竟日不得食采野蕨充膳操瓢量水坐長松古石間飲之李天植字因仲平湖人崇禎癸酉舉人改名確字潛夫甲申後餘田四十畝宅一區乃並家具分與所後子震及女而與妻別隱陳山絕迹不入城市訓山中童子自給居十年以僧開堂始避喧返廬園賣文自食不足則與其妻爲樓簾竹筥以佐之好事者約月供薪米力辭不

受有司慕其高往訪之輒踰垣避所著詩文皆巾甲申以來殉節者廢園者乍浦勝地可望見海市者也又十年家益困鬻其園寄身僧舍戚友贖而歸之始復與妻居時年七十矣子震亦棄諸生非義一介不取老夫婦白頭相對時絕食則炊曰吾生本贅耳待盡而已有餽食者非其人終不受或問身後曰楊王孫之葬何必棺也又十年廢園僅存二楹兩耳聾又苦腹疾終日仰臥客至以粉版書相問會魏禧來自江西造其廬天植與之粉版書竟天植視姓字則強起張目視之泣禧亦泣時方絕糧禧探囊得銀半兩贈之五反不受固以請曰此非盜跖物也始納之買米爲炊共食而別禧屬布衣周賔侍郎曹溶糾同志爲繼業且謀身後事徐枋聞之曰李先生不食人食聽其以餓死可也已而賔齋粟往天植果堅拒禧聞之曰吾淺之乎爲丈夫已乍浦有鄭嬰垣者孤介絕俗與天植稱金石交先二年凍死雪中至是天植亦餓死臨歿曰吾無愧於老友矣時康熙十一年也年八十有二葬牛橋所著有廢園集乍浦九山志理洪儲字繼起興化人本姓李父嘉兆與中州理學和恥與賊同姓皆改理氏天下

稱二理洪儲早歲出家南都覆明之遺臣多舉兵洪儲左右之被逮獲免好事如故人戒之則曰吾苟自反無媿即有意外風波久當自定又曰憂患得其宜湯火亦樂國也枋聞之嘆曰是真能以忠孝作佛事者也洪儲在沙門宏暢宗風篤好人物海內皆能道之枋曰此其跡也但觀其每年三月十九日素服焚香北面揮涕二十八年如一日是何爲者

顧柔謙字剛中無錫人遷常熟幼遭家難資產皆盡嘗同兄出門遊有數人擁之行行乃擠大澤中母忽心動急呼老僕往跡之得不死補弟子員甲申之變柔謙哀憤往往形諸詩歌讀者悲之不安交遊以父執師事馬士奇而江陰黃毓祺嘉定黃淳耀皆一見定交諸人殉國難柔謙皆設位以哭盡哀子祖禹見父嘗閉門嘿坐或竟日不食祖禹叩頭寬譬柔謙乃曰汝能終身窮餓不思富貴乎祖禹跪應曰能柔謙曰汝能以身爲人機上肉不思報復乎祖禹復應曰能柔謙喜曰吾與汝偕隱耳遂更名隱署其室曰伐檀常夜蹴祖禹曰汝他日得志如舊怨何祖禹曰每憶幼時祖母抱兒置膝上爲言家難及墮大澤中事

祖禹不敢忘柔謙曰嘻汝何見之隘吾家數傳以來頗盈盛以祖父之才而竟中折天也於彼何尤同室之中甯彼以非禮來吾不可以非禮報汝謹識之著有補韻略六書攷定山居贅論祖禹字復初柔謙精於史學嘗謂明一統志於戰守攻取之要類皆不詳山川條列又復割裂失倫源流不備祖禹承其志撰讀史方輿紀要一百三十卷凡職方廣輿諸書承譌襲謬皆爲駁正詳於山川險易及古今戰守成敗之蹟而景物名勝皆在所略初稿時年二十九及成書年五十矣甯都魏禧見之歎曰此數千百年絕無僅有之書也以其書與梅文鼎秣算全書李清南北史合鈔稱三大奇書祖禹與禧爲金石交禧客死祖禹經紀其喪徐乾學奉敕修一統志延致祖禹將荐起之力辭罷後終於家冒襄字辟疆別號巢民如皋人父起宗明副使襄十歲能詩董其昌爲作序崇禎壬午副榜貢生當授推官會亂作遂不出與桐城方以智宜興陳貞慧商邱侯方域並稱四公子襄少年負盛氣才特高尤能傾動人嘗置酒桃葉渡會六君子諸孤一時名士咸集酒酣輒發狂悲歌嘗嘗懷甯阮大鍼大鍼故奄黨也

時金陵歌舞諸部以懷甯爲冠歌詞皆出大鍼大鍼欲自結諸社人令歌者來
裏與客且罵且稱善大鍼聞之益恨甲申黨獄興裏賴救僅免家故有園池亭
館之勝歸益喜客招致無虛日家自此中落怡然不悔也裏既隱居不出名益
盛督撫以監軍薦御史以人才薦皆以親老辭康熙中復以山林隱逸及博學
鴻詞薦亦不就著述甚富行世者有先世前徽錄六十年師友詩文同人集樸
巢詩文集水繪園詩文集書法絕妙喜作擘窠大字人皆藏弄珍之康熙三十
二年卒年八十有三私諡潛孝先生陳貞慧字定生宜興人明都御史陳于廷
子于廷東林黨魁貞慧與吳應箕草留都防亂檄阮大鍼黨禍起逮貞慧至
鎮撫司事雖解已濱十死國亡埋身土室不入城市者十餘年遺民故老時時
向陽羨山中一問生死流連痛飲驚離弔往聞者悲之順治十三年卒年五十
三著有皇明語林山陽錄雪岑集交游錄秋園雜佩諸書子維崧見文苑傳
祁班孫字奕喜山陰人父彪佳明蘇松巡撫班孫次六人稱六公子彪佳嘗受
業於劉宗周宗周將兵江上班孫與其兄理孫罄家餉之祁氏藏書甲江左班

孫兄弟以故國喬木自任豪宕喜結客家居山陰之梅墅園林深茂登其堂複壁大隧莫能詰也慈谿布衣魏耕者狂走四方思得一當班孫兄弟與之誓天稱莫逆或告變於浙大吏四道捕耕並縛班孫兄弟去既讞兄弟爭承祁氏客乃納賂而宥其兄班孫遣戍遼左理孫竟以痛弟鬱鬱死而祁氏家亦破旋班孫遁歸祝髮於吳之堯峯尋主毘陵馬鞍山寺所稱呪林明大師者也班孫好議論古今不談佛法每語及先朝則掩面哭然終莫有知之者康熙十二年卒發其篋有東行風俗記紫芝軒集且得其遺教命歸附乃知爲山陰祁六公子遂得返葬云班孫娶少師朱燮元女孫朱工詩其來歸也與其姑商媼張小姑湘君時相唱和商氏字冢婦曰楚纓字介婦曰趙璧以志閨門之盛班孫旣被難朱盛年孤燈緇帳數十年未嘗一出廳屏自班孫兄弟歿淡生堂書星散論者謂江東文獻一大厄運也

汪渢字魏美錢塘人少孤貧力學與人落落寡諧人號曰汪冷舉崇禎己卯鄉試與同縣陸培齊名甲申後培自經死渢爲文祭之一慟幾絕遂棄科舉嫻黨

欲強之試禮部出千金賂其妻俾勸駕妻曰吾夫子不可勸吾亦不附此金也嘗獨身提藥裹往來山谷間宿食無定處漚故城居母老欲時時見漚其兄澄弟湛亦棄諸生服奉母徙城外漚時來定省然漚能自來家人欲往跡之不可得嗣因兵亂奉母入天台海上師起羣盜滿山谷復反錢塘當是時湖上有三孝廉皆高士漚其一也當事皆重之監司盧高尤下士一日遇漚於僧舍問汪孝廉何在漚應曰適在此今已去矣高悵然不知應者即漚也高嘗贖舟載酒西湖上約三高士以世外禮相見惟漚不至已知其在孤山以船就之排牆遁去漚不入城市有司或以俸金爲壽不得卻坎而埋之里貴人請募銘饋百金拒弗納徙居孤山匡牀布被外殘書數卷鍵戶出或返或不返莫可蹤跡遇好友飲酒一斗不醉晚好道夜觀天象晝習壬遁能數日不食了不問世事黃宗義遇之於孤山講龍溪調息法嘗坐月至三更夜寒甚止布被一漚與宗義背相摩得少煖氣魏禧自江西來訪謝弗見禧留書曰吾甯都魏禧也欲與子握手一痛哭耳漚省書大驚一見若平生歡臨別執手涕下漚嘗從愚菴和尚究

出世法禧曰君事愚菴謹豈有意爲其弟子耶瀕曰吾甚敬愚菴然今之志士多爲釋氏牽去此吾所以不屑也康熙四年秋終於寶石山僧舍年四十有八臨歿舉書卷焚之詩文無一存者起視日影曰可矣書五言詩一章投筆就寢而逝瀕與陳廷會柴紹炳沈昀孫治人稱西陵五君子

余增遠字謙貞世稱若水先生會稽人明崇禎十六年進士除寶應知縣南都授禮部主事遷郎中事敗逃之山中郡縣逼之出見乃輿疾城南以死拒久之事得解草屋三間不蔽風雨以蠶甲承漏聚村童五六人授以三字經臥榻之下牛宮鷄堞無下足處晨則秉耒出與老農雜作同年生王天錫爲海防道欲與話舊以疾辭天錫披帷直入增遠擁衾不起曰不幸有狗馬疾不得與故人爲禮天錫執手勞苦出門未數武則已與一婢子擔糞灌園矣天錫遙望見之歎息去冬夏一皂帽雖至昵者不見其科頭增遠慨世路偏仄遂疑苟卿性惡之說爲確至欲著論以非孟康熙八年卒年六十有五蓋二十有四年不出城南一步也疾革黃宗羲造其榻前欲爲切脈增遠笑曰某祈死二十年前反祈

生二十年後乎宗義泣然而別同時有周齊曾者字思沂號唯一郵人增遠同年進士也知廣東順德縣事變社倉爲義田而以社倉之法行之國變後棄官遁入剡源盡去其髮爲髮冢架險立飄榜曰囊雲自稱無髮居士剡源饒水石與山僧樵子出沒瀑聲虹影間天錫訪之拒曰咫尺清輝舉目有山河之異不願見也爲詩文機鋒電激汪洋自恣寓言十九然清苦自立胸中兀然有所不可與增遠無二也黃宗義嘗爲兩人合誌其墓云

傅山字青主陽曲人六歲啖黃精不穀食強之乃飯讀書過目成誦明季天下將亂諸號爲搢紳先生者多迂腐不足道憤之乃堅苦持氣節不少嬖倖提學袁繼咸爲巡按張孫振所誣孫振閹黨也山約同學曹良直等詣通政使三上書訟之巡撫吳甡亦直袁遂得雪山以此名聞天下甲申後山改黃冠裝衣朱衣居士穴以養母繼咸自九江執歸燕邸以難中詩遣山且曰不敢媿友生也山省書慟哭曰嗚呼吾亦安敢負公哉順治十一年以河南獄牽連被逮抗詞不屈絕粒九日幾死門中有以奇計救之得免然山深自咤恨謂不若速死

爲安而其仰視天俯視地者未嘗一日止比天下大定始出與人接康熙十七年詔舉鴻博給事中李宗孔薦固辭有司強迫至令役夫舁其牀以行至京師二十里誓死不入大學士馮溥首過之公卿畢至山臥牀不具迎送禮魏象樞以老病上聞詔免試加內閣中書以寵之馮溥強其入謝使人舁以入望見大溝門淚潞潞下仆於地魏象樞進曰止止是即謝矣翼日歸溥以下皆出城送之山歎曰今而後其脫然無累哉既而曰使後世或妄以許衡劉因輩賢我且死不瞑目矣聞者咋舌至家大吏咸造廬請謁山冬夏著一布衣自稱曰民或曰君非舍人乎不應也卒以朱衣黃冠歛山工書畫謂書甯拙毋巧甯醜毋媚甯支離毋輕滑甯眞率毋安排人謂此言非止言書也詩文初學韓昌黎崛強自喜後信筆抒寫俳調俗語皆入筆端不顧以此名家矣著有霜紅龜集十二卷子眉先卒詩亦附焉眉字壽髦每日出樵置書擔上休則把讀山常賣葯四方與眉共挽一車暮抵逆旅篝燈課經力學繼父志與客談中州文獻滔滔不盡山喜苦酒自稱老槩禪眉乃稱曰小槩禪

費密字此度新繁人父經虞明雲南昆明縣知縣密年十四父病醫言嘗冀甘苦可知生死密嘗而苦父病果起未幾流賊張獻忠犯蜀密上書巡按御史劉之勃陳戰守策不省已而全蜀皆陷密展轉窮山中會有人傳其父滇中消息聞之痛哭遂去家入滇經歷蠻峒中奉父自滇歸蜀至建昌衛爲囚者蠻所得父路蠻人始脫歸明將楊展聞密名遣使致聘密乃說展曰賊亂數年民且無食今非屯田無以救蜀民且兵不能自立展納其言命子總兵官璟偕密屯田於榮經瓦屋山之楊村以次舉其法行諸州縣後展爲袁韜武大定所殺密與璟整師爲復仇計嘗與賊戰躬自擐甲左手爲刃所傷時璟營於峨眉神將有與花溪民毆爭者言花溪居民下石擊吾營勢且反以怒璟璟欲引兵誅之密力爭曰花溪吾民也方與賊戰而殺吾民彼變從賊是益賊也璟乃止全活數百家後密還成都省墓至新津爲武大定兵所掠知密嘗參展軍事欲殺之以計得免密歎曰旣不能報國又不能庇親及身不如舍而他去遂奉父由成都北行入秦溯漢江下吳越流寓泰州老焉經虞遂於經學嘗著毛詩廣義雅論

諸書以漢儒注說爲宗密盡傳父業又博證學士大夫與王復禮毛甦閻若璩交密一足跡後往蘇門謁孫奇逢稱弟子工詩古文俯仰取給於授徒賣文人咸重其品悲其遇州守爲之除徭役杜門三十年著書甚多密謂宋人以周程接孔孟盡黜二千餘年儒者爲未聞道乃上稽古經正史旁及羣書作中傳正紀百二十卷序儒者授受原流自子夏始又作宏道書十卷古今篤論四卷中旨定錄四卷中旨辨錄四卷中旨申威四卷皆申明宏道書之旨又有尙書說周官注論二南偶說中庸大學駁議四禮補篇史記箋古史正歷代貢舉合議費氏家訓及詩文集卒年七十七子錫琮錫璜世其學

王宏撰字無異號山史華陰人明諸生博雅能古文嗜金石藏古書畫金石最富又通濂洛關閩之學好易精圖象學者翕然宗之關中人士領袖也與李顥李柏李因篤齊名時以得一言爲榮凡碑版銘誌非三李則宏撰而宏撰工書法故求者多於三李宏撰交遊遍天下甲申後奔走結納尤著志節顧炎武徧觀四方至華陰謂秦人慕經學重處士持清議他邦所少華陰綰轂之口雖足

不出戶而能見天下之人聞天下之事欲定居宏撰爲營齋舍居之炎武嘗曰好學不倦篤於朋友吾不如王山史當時儒碩遺逸皆與宏撰往還頗推重之宏撰嘗集炎武及孫枝蔚閻爾梅等數十人所與書札合爲一冊手題曰友聲集各注姓氏中有爲謀炎武卜居華下事言此舉大有關係世道人心實皆攸賴唯速圖之蓋當日華下集議實有所爲也康熙間以鴻博徵不赴初與因篤同學甚密及因篤就徵遂與之絕宏撰所居華山下有讀易廬與華峰相向稱絕勝卒年七十有五著有易象圖說山志砥齋集

杜濬字于皇號茶村黃岡人明季爲諸生避亂居金陵少倜儻嘗欲著奇節既不得試遂刻意爲詩然不欲以詩人自名也於並世人獨重宣城沈壽民吳中徐枋自媿不如其在金陵與方仲舒善仲舒苞父也金陵寇蓋輻輳諸公貴人求詩者踵至多謝絕錢謙益嘗造訪至閉門不與通惟故舊徒步到門則偶接焉門內爲竹關關外設坐約客至視鍵閉則坐而待不得叩關雖大府至亦然及功令有挑門之役有司案籍欲優免濬曰是吾所服也躬雜廝輿夜巡綽衆

莫能止嗜茗飲嘗言吾有絕糧無絕茶既有花冢因拾殘茗聚封之謂之茶邱
年七十七卒於揚州喪歸故人謀卜兆子世濟曰吾有親而以葬事辱二三君
乎是謂我非人也亡何世濟卒又數年陳鵬年來守金陵始葬諸將山北梅花
村溶詩最富世所傳不及十一手定者四十七冊吳偉業嘗云吾五言律得茶
村焦山詩而始進閣若璩於時賢多所嘗警獨許溶五律稱爲詩聖已刻者曰
雙雅堂集弟芥字蒼略號些山諸生與兄同避亂金陵昆弟行身略同而趣各
異溶峻廉隅孤特自遂遇名貴人必以氣折之於衆人未嘗接語言用此叢忌
嫉然名在天下詩每出遠近爭傳誦之芥則退然自同於衆所著詩歌古文雖
子弟弗示也方壯喪偶不復娶所居室漏且穿木榻敝帷數十年未嘗易室中
終歲不掃除每日中不得食兒女啼號客至無酒漿意色間無幾微不自適者
行於途嘗避人不中道與人言雖兒童厮輿惟恐或傷之也後兄七年卒年七
十七有些山集

郭都賢字天門益陽人天啟壬戌進士授行人分校順天鄉試得史可法等六

人歷官員外郎出爲四川參議督江西學政分守嶺北道巡撫江西時張獻忠已逼境賊騎充斥都賢晝夜繕守禦兵餉無措乃大會屬僚凡官司一應供給皆捐以助餉左良玉屯兵九江驕蹇觀望都賢惡其淫掠檄歸之而募士兵爲成會有尼之者遂乞病棄官入廬山逾年北京陷悲憤不食南都建號史可法開闢揚州薦授以官辭不赴桂王立肇慶以兵部尙書召而都賢已祝髮爲僧矣先是洪承疇坐事落職都賢奏請起用至是承疇經略西南以故舊謁都賢於山中餽以金不受奉攜其子監軍亦堅辭都賢見承疇時故作目昧狀承疇驚問何時得目疾都賢曰始吾識公時目故有疾承疇默然都賢篤至性哀樂過人嚴而介風骨嶄然博學強識工詩文書法瘦硬兼善繪事寫竹尤入妙僧號頑石又號些菴茹苦無定居初依熊開元尹民興於嘉魚住梅熟菴已流寓海陽築補山堂前後十九年歸結草廬桃花江客死江寧承天寺有女名純貞許字黔國公沐氏變後音問梗絕遂終於家純貞能詩自署曰郭貞女都賢所著有衡嶽集止菴集秋聲吟西山片石集破草鞵集補山堂集些菴雜著等書

陶汝鼎字仲調一字密菴寧鄉人與都賢交最篤崇禎初充拔貢生會帝幸太學羣臣請復高皇積分法祭酒顧錫嘯奏薦汝鼎才特賜第一詔題名勒石太學除五品官不拜乞留監肄業癸酉舉於鄉兩中會試副榜南渡後薙髮爲山號忍頭陀生平內行篤父殤哀慕終身事母曲盡孝養處族黨多厚德嘗爲人雪奇冤冒險難活千餘人然不自言也詩古文有奇氣著有廣西涯樂府唳古集寄雲樓集褐玉堂集嘉樹堂集都賢爲序而行之有生同里長同學出處患難同時同志之語

李世熊字元仲寧化人明諸生少負奇氣植大節更危險死生弗渝篤交遊敢任難事生平喜讀異書博聞強記年八十讀書恒至夜分始休六經諸子百家靡不貫究然獨好韓非屈原韓愈之書其爲文沈深峭刻奧博離奇悲憤之音稱其所遇縱論古今興亡儒生出處及江南北利害備兵屯田水利諸大政輒慷慨歎歎涔涔泣下不止年十六補弟子員旋中天啟元年副榜以興化司李余昌祚得其文爭元於主司弗得補其卷去曰須後作元也典閩試者爭欲物

色之爲重甲申後自號寒支道人屏居不見客徵書累下固謝卻之凡守令監司鎮將至其門者罕能一識面閩中擁唐王監國用大學士黃道周禮部侍郎曹學詮都察院何楷薦徵拜翰林博士辭不赴嘗上書道周感憤時事及道周殉節走福州請寢郵時恤問其孤煖順治初師入閩有騎斨於郡帥者帥遣某生移書逼入都且言不出山禍不測世熊復之曰死生有命豈遂懸於要津之手且某年四十八矣諸葛瘁躬之日僅少一年文山盡節之辰已多一歲何能抑情違性重取羞辱哉時蜚語騰沸世熊矢死不爲動疑謗旋亦釋世熊旣以文章氣節著一時名大震辛卯壬辰間建昌潰賊黃希孕剽掠過寧化有卒摘其園中二橘希孕立鞭之駐馬園側視卒盡過乃行粵寇至燔民屋火及其園賊魁劉大勝遣卒撲救之曰奈何壞李公居當時雖匹夫匹婦無不知有寒支子者世熊積塋塊胷中每放浪山水以寫其牢騷不平之概嘗詣西江交魏禧魏禮彭士望諸子相與泛彭蠡登廬山絕頂追維闔賊橫行時事痛悼如絕淚下如泉湧不能禁也耿精忠反遣僞使敦聘世熊嚴拒之自春徂冬堅臥不起

乃得免世熊山居四十餘年鄉人宗之爭趨決事有爲無善者曰不使李公知也晚自號槐菴顏其齋曰但月所著有寒支集寧化縣志本行錄經正錄狗馬史記等年八十五卒於家世熊有三弟早世遺子女撫育裝遣之饋遺其親戚終身又獨建祖祠修祖墓編述九世以來宗譜凡祭祀必親必謹父母忌日則減餐絕宴會元日展先人遺像則泣下沾襟拜伏不能起蓋其孝友出於天性云

談遷字孺木原名以訓海寧人初爲諸生南都立以中書薦召入史館皆辭曰余豈以國家之不幸博一官耶未幾歸里遷肆力經史百家言尤注心於明朝典故嘗謂史之所憑者實錄耳實錄見其表其在裏者已不可見况革除之事楊文貞未免失實秦陵之盛焦泌陽又多醜正神烹之載筆者皆逆奄之舍人至於思陵十七年之憂勤惕厲而太史遜荒皇成烈燄國滅而史亦隨滅普天心痛莫甚於此乃汰十五朝實錄正其是非訪崇禎十七年邸報補其缺文成書名曰國樞當是時人士身經喪亂多欲追敘緣因以顯來世而見聞窄狹無

所憑籍聞遷有是書思欲竊之爲已有遷家貧不見可欲者夜有盜入其室盡發藏案以去遷喟然曰吾手尙在甯遂已乎從嘉善錢氏借書復成之陽城張慎言目爲奇士折節下之慎言卒遷方北走昌平哭思陵復欲赴陽城哭慎言未至而卒順治十二年冬十一月也黃宗羲爲表其墓明末遺逸守志不屈身雖隱而心不死至事不可爲發憤著書欲託空文以見志如遷者其憂憤豈有已耶故以附於各省遺逸之末

清史稿

列傳

藝術傳一

自司馬遷傳扁鵲倉公及日者龜策史家因之或曰方技或曰藝術大抵所收多醫卜陰陽術數之流間及工巧夫藝之所賅博矣衆矣古以禮樂射御書數爲六藝士所常肄而百工所執皆藝事也近代方志於書畫技擊工巧並入此類實有合於古義聖祖天縱神明多能藝事貫通中西厯算之學一時鴻碩蔚成專家國史蹟之儒林之列測繪地圖鑄造槍礮始倣西法凡有一技之能者往往召直蒙養齋其文學侍從之臣每以書畫供奉內廷又設如意館制倣前代畫院兼及百工之事故其時供御器物雕組陶埴靡不精美傳播遐邇稱爲極盛沿及高宗之世風不替焉欽定醫宗金鑑薈萃古今學說宗旨純正於陰陽術數家言亦有協紀辨方一書頒行沿用從俗從宜隱示崇實黜虛之意斯微微尙矣中葉後海禁大開泰西藝學諸書灌輸中國議者以工業爲強國根本於是研格致營製造者乘時而起或由舊學以擴新知或杼心得以濟實用

世乃愈以藝事為重探其可傳者著於篇各以類為先後卓然成家者具述授受源流兼有政績文學列入他傳者附存梗概凡涉荒誕俳諧之說屏勿載後之覽者庶為論世之資云

藝術一

吳有性

蘇州人 字大章 餘嘉

喻昌

餘杭

張璐

周高 學斗 南魁

張志聰

陳高 金世 祖試 黃慎 元鎮 御賜

柯琴

尤怡

葉桂

蘇州 葉桂 吳士 趙

徐大椿

王 維 德

吳謙

綽爾濟

張伊 制榮 魁何

陸懋修

鄭王 謝內 費呂 怡鳳 維

蔣平階

章攀桂

劉祿

張永 文祚

吳有性字又可江南吳縣人生於明季居太湖中洞庭山當崇禎辛巳歲南北直隸山東浙江大疫醫以傷寒法治之不效有性推究病源就所歷驗著瘟疫

論謂傷寒自毫竅入中於脈絡從表入裏故其傳經有六自陽至陰以次而深
瘟疫自口鼻入伏於膜原其邪在不表不裏之間其傳變有九或表或裏各自
爲病有但表而不裏者有表而再表者有但裏而不表者有裏而再裏者有表
裏分傳者有表裏分傳而再分傳者有表勝於裏者有先表後裏者有先裏後
表者其間有與傷寒相反十一事又有變證兼證種種不同並著論製方一一
辨別古無瘟疫專書自有性書出始有發明其後有戴天章余霖劉奎皆以治
瘟疫名天章字嬰郊江蘇上元人諸生好學強記尤精於醫所著傷寒雜病諸
書及咳論注痢論注廣瘟疫論凡十餘種其論瘟疫一宗有性之說謂瘟疫之
異於傷寒尤慎辨於見證之始辨氣辨色辨舌辨神辨脈益加詳焉爲人療病
不受謝子瀚成雍正元年一甲第二名進士霖字師愚安徽桐城人乾隆中桐
城疫霖謂病由熱淫投以石膏輒愈後數年至京師大暑疫作醫以張介賓法
者多死以有性法亦不盡驗鴻臚卿馮應榴姬人呼吸將絕霖與大劑石膏應
手而痊踵其法者活人無算霖所著曰疫疹一得其論與有性有異同取其辨

證而以用達原飲及三消承氣諸方猶有附會表裏之意云奎字文甫山東諸城人乾隆末著瘟疫論類編及松峯說疫二書松峯者奎以自號也多爲窮鄉僻壤艱覓醫藥者說法有性論瘟疫已有大頭瘟疫瘡瘟疫絞腸瘟疫軟腳瘟疫之稱奎復舉北方俗諺所謂諸疫證名狀一一剖析之又以貧寒病家無力購藥取鄉僻恆有之物可療病者發明其功用補本草所未備多有心得同時昌邑黃元御治疫以浮萍代麻黃即本奎說所著書流傳日本醫家著述亦有取焉喻昌字嘉言江西新建人幼能文不羈與陳際泰游明崇禎中以副榜貢生入都上書言事尋詔徵不就往來靖安間披髮爲僧復蓄髮游江南順治中僑居常熟以醫名治療多奇中才辯縱橫不可一世著傷寒尙論篇謂林億成無已過於尊信王叔和惟方有執作條辨削去叔和序例得尊經之旨而猶有未達者重爲編訂其淵源雖出方氏要多自抒所見惟溫證論中以溫藥治溫病後尤怡陸懋修並著論非之又著醫門法律取風寒暑溼燥火六氣及諸雜證分門著論次法次律法者治療之術運用之機律者明著醫之所以失而判定其

罪如折獄然昌此書專爲庸醫誤人而作分別疑似使臨診者不敢輕嘗有功醫術後附寓意草皆其所治醫案凡診病先議病後用藥又與門人定議病之式至詳審所載治驗反覆推論務闡審證用藥之所以然異於諸家醫案但泛言某病用某藥愈者並爲世所取法昌通禪理其醫往往出於妙悟尙論後篇及醫門法律年七十後始成昌既久居江南從學者甚多徐彬字忠可浙江嘉興人昌之弟子著傷寒一百十三方發明及金匱要略論注其說皆本於昌四庫著錄金匱要略即用彬論注本凡疏釋正義見於注或臆義及總括諸證不可專屬者見於論彬謂他方書出於湊集就採一條時亦獲驗若金匱之妙統觀一卷全體方具不獨察其所用並須察其所不用世以爲篤論

張璐字路玉自號石頑老人江南長洲人少穎悟博貫儒業專心醫藥之書自軒岐迄近代方法無不搜覽遭明季之亂隱於洞庭山中十餘年著書自娛至老不倦倣明王肯堂證治準繩彙集古人方論近代名言薈萃折衷之每門附以治驗醫案爲醫歸一書後易名醫通路謂仲景書衍釋日多仲景之意轉晦

後見尙論條辨諸編又廣搜祕本反覆詳玩始覺向之所謂多歧者漸歸一貫
著傷寒續論緒論續者祖仲景之文緒者理諸家之紛紜而清出之以翼仲景
之法其注本草疏本經之大義並系諸家治法曰本經逢原論脈法大義曰診
宗三昧皆有心得又謂唐孫思邈治病多有奇異遂方研求藥性詳爲疏證曰
千金方釋義並行於世璐著書主博通持論平實不立新異其治病則取法薛
己張介賓爲多年八十餘卒聖祖南巡璐子以柔進呈遺書溫旨留覽焉子登
倬皆世其業登字誕先著傷寒舌鑑倬字飛疇著傷寒兼證析義並著錄四庫
高斗魁字旦中又號鼓峯浙江鄞縣人諸生兄斗樞明季死國難斗魁任俠於
遺民罹難者破產營救妻因事連及勒自裁素精醫遊杭見昇棺者血漉地曰
是未死啟棺與藥而甦江湖間傳其事求治病者無不醫著醫學心法又吹毛
編則自記醫案也其論醫宗旨亦近於張介賓周學海字澂之安徽建德人總
督馥子光緒十八年進士內閣中書官至浙江候補道潛心醫學論脈尤詳著
脈義簡摩脈簡補義診家直訣辨脈平脈章句引申舊說參以實驗多心得之

言博覽羣籍實事求是不取依託附會慕宋人之善悟故於史堪張元素劉完素滑壽及近世葉桂諸家書皆有評注自言於清一代名醫服膺張璐葉桂兩家證治每取璐說蓋其學頗與相近宦游江淮間時爲人療治常病不異人遇疑難輒有奇效刻古醫書十二種所據多宋元舊槧藏家祕笈校勘精審世稱善本云

張志聰字隱庵浙江錢塘人明末杭州盧之頤繇父子著書講明醫學志聰繼之構侶山堂招同志講論其中參考經論辨其是非自順治中至康熙之初四十年間談軒岐之學者咸歸之注素問靈樞二經集諸家之說隨文衍義勝明馬元臺本又注傷寒論金匱要略於傷寒論致力尤深歷二十年再易稿始成用王叔和原本略改其編次首列六經病次列霍亂易復並瘧濕渴汗吐下後列辨脈平脈而刪叔和序例以其與本論矛盾故去之以息辨駁辨成無已舊注謂風傷衛寒傷營脈緩爲中風脈緊爲傷寒傷寒惡寒無汗宜麻黃湯中風惡風有汗宜桂枝湯諸說未盡當而風寒兩感營衛俱傷宜大青龍湯爲尤謬

其注分章以明大旨節解句釋兼晰陰陽血氣之生始出入經脈藏府之貫通循行使讀論者取之有本用之無窮不徒求之糟粕庶免終身由之而不知其道也又注本草詮釋本經闡明藥性本五運六氣之理後人不經臆說概置勿錄其自著曰侶山堂類辨鍼灸秘傳志聰之學以素靈金匱爲歸生平著書必守經法遺書並行於世惟鍼灸秘傳佚高世拭字士宗與志聰同里少家貧讀時醫通俗諸書年二十三即出療病頗有稱後自病時醫治之益劇久之不藥幸愈翮然悔曰我治人殆亦如是是草菅人命也乃從志聰講論軒岐仲景之學歷十年悉窺精奧遇病必究其本末處方不同流俗志聰注本草崇原未竟世拭繼成之又注傷寒論晚著醫學真傳示門弟子自述曰醫理如剝蕉剝至無可剝方爲至理以之論病大中至正一定不移世行分門別類之方書皆醫門糟粕如薛己趙獻可輩雖有穎悟變通非軒岐仲景一脈相傳之大道古人云不知十二經絡開口舉手便錯不明五運六氣讀盡方書無濟病有標有本求其標只取本治千人無一損故示正道以斥旁門使學者知所慎後有張錫

駒字令韶亦錢塘人著傷寒論直解胃氣論其學本於志隱陳念祖字修園福建長樂人乾隆五十七年舉人著傷寒金匱淺注本志聰錫駒之說多有發明世稱善本嘉慶中官直隸威縣知縣有賢聲值水災大疫親施方藥活人無算晚歸田以醫學教授門弟子甚衆著書凡十餘種並行世黃元御字坤載山東昌邑人諸生因庸醫誤藥損目發憤學醫於素問靈樞難經傷寒論金匱玉函經皆有注釋凡數十萬言自命甚高喜更改古書以伸己說其論治病主於扶陽以抑陰

柯琴字韻伯浙江慈谿人博學多聞能詩古文辭兼舉子業矢志醫學家貧游吳棲息於虞山不以醫自鳴當世亦鮮知者著內經合璧多所校正書佚不傳注傷寒論名曰來蘇集以方有執喻昌等各以己意更定有背仲景之旨乃據論中有太陽證桂枝證柴胡證諸辭以證名篇彙集六經諸論各以類從自序略曰傷寒論經王叔和編次已非仲景之舊讀者必細勘何者爲仲景言何者爲叔和筆其間脫落倒句訛字衍文一一指破頓見眞面且筆法詳略不同或

互文見意或比類相形因此悟彼見微知著得於語言文字之外始可羽翼仲景自來注家不將全書始終理會先後合參隨文敷衍彼此矛盾黑白不分三百九十七法不見於仲景序文又不見於叔和序例林氏倡於前成氏和於後其不足取信王安道已辨之矣繼起者猶瑣瑣於數目亦何補於古人何功於後學哉大青龍湯仲景爲傷寒中風無汗而兼煩燥者設即加味麻黃湯耳而謂其傷寒見風傷風見寒因以麻黃湯主寒傷營桂枝湯主風傷衛大青龍湯主風寒兩傷營衛曲成三綱鼎立之說此鄭聲之亂雅樂也且以十存二三之文而謂之全篇手足厥冷之厥或混於兩陰交盡之厥其間差謬何可殫舉此愚所以執卷長吁不能已也又著傷寒論翼自序略曰仲景著傷寒雜病論合十六卷法大備其常中之變變中之常靡不曲盡使全書俱在盡可見論知源自叔和編次傷寒雜病分爲兩書然本論中雜病留而未去者尙多雖有傷寒論之專名終不失雜病合論之根蒂也名不副實並相淆混而旁門歧路莫知所從豈非叔和之謬以禍之歟夫仲景之言六經爲百病之法不專爲傷寒一

科傷寒雜病治無二理咸歸六經之節制治傷寒者但拘傷寒不究其中有雜病之理治雜病者復以傷寒論無關於雜病而置之不問將參贊化育之書悉歸狐疑之域愚甚爲斯道憂之論者謂琴二書大有功於仲景尤怡字在涇江蘇吳縣人父有田千畝至怡中落貧甚鬻字於佛寺業醫人未之異也好爲詩與同里顧嗣立沈德潛游晚年學益深造治病多奇中名始著性淡榮利隱於花溪自號餽鶴山人著書自得其注傷寒論名曰貫珠集謂後人因王叔和編次錯亂辨駁改訂各成一家言言愈多而理愈晦乃就六經各提其綱於正治法之外太陽有權變法幹旋法救逆法類病法陽明有明辨法雜治法少陽有權變法太陰有藏病經病法經藏俱病法少陰厥陰有溫法清法凡病機進退微權各有法以爲辨使讀者先得其法乃能用其方分證甚晰於少陰厥陰溫清兩法尤足破世人之惑注金匱要略名曰心典別撰集諸家方書雜病治要足以羽翼仲景者論其精蘊曰金匱翼又著醫學讀書記於軒岐以下諸家多有折衷徐大椿稱爲得古人意怡著述並篤雅世以貫珠集與柯琴來蘇集並

重焉

葉桂字天士江蘇吳縣人先世自歙遷吳祖時父朝采皆精醫桂年十四喪父從學於父之門人聞言即解見出師上遂有聞於時切脈望色如見五藏治方不出成見嘗曰劑之寒溫視乎病前人或偏寒涼或偏溫養習者茫無定識假兼備以倖中借和平以藏拙朝用一方晚易一劑詎有當哉病有見證有變證必胸有成竹乃可施之以方其治病多奇中於疑難證或就其平日嗜好而得救法或他醫之方略與變通服法或竟不與藥而使居處飲食消息之或於無病時預知其病或預斷數十年後皆驗當時名滿天下傳聞附會往往涉於荒誕不具錄卒年八十臨歿戒其子曰醫可爲而不可爲必天資敏悟讀萬卷書而後可以濟世不然鮮有不殺人者是以藥餌爲刀刃也吾死子孫慎勿輕言醫桂神悟絕人貫徹古今醫術而妙著述世傳所注本草多心得又許叔微本事方釋義景岳發揮歿後門人集醫案爲臨證指南非其自著附幼科心法一卷傳爲桂手定徐大椿謂獨精卓後章楠改題曰三時伏氣外感篇又附溫證

證治一卷傳爲口授門人顧景文者楠改題曰外感溫證篇二書最爲學者所
奉習同里薛雪名亞於桂而大江南北言醫輒以桂爲宗百餘年來私淑者衆
最著者吳塘章楠王士雄雪字生白自號一瓢少學詩於同郡葉燮乾隆初舉
鴻博未遇工畫蘭善拳勇博學多通於醫時有獨見斷人生死不爽療治多異
迹生平與桂不相能自名所居曰掃葉莊然每見桂處方而善未嘗不掣節也
著醫經原旨於靈素奧旨具有發揮世傳溼溫篇爲學者所宗或曰非雪作其
醫案與桂及繆遵義合刻遵義亦吳人乾隆二年進士官知縣因母病通方書
棄官爲醫用藥每出創意吳中稱三家焉塘字鞠通江蘇淮陰人乾嘉之間游
京師有名學本於桂以桂立論甚簡但有醫案散見於雜證之中人多忽之著
溫病條辨以暢其義其書盛行同時歸安吳貞著傷寒指掌亦發明桂醫案之
旨與塘相同楠字虛谷浙江會稽人著醫門棒喝謂桂雪最得仲景遺意而他
家不與士雄字孟英浙江海鹽人居於杭世爲醫士雄讀書礪行家貧仍以醫
自給咸豐中杭州陷轉徙上海時吳越避寇者膺集疫癘大作士雄療治多全

活衛著霍亂論致慎於溫補至是重訂刊行醫者奉爲圭臬又著溫熱經緯以軒岐仲景之文爲經葉薛諸家之辨爲緯大意同章楠注釋兼採昔賢諸說擇善而從勝楠書所著凡數種以二者爲精詳同時浙西論醫者平湖陸以恬嘉善汪震烏程汪曰楨宗旨略同陽湖張琦曜係父子皆通儒以醫鳴取黃元御扶陽之說偏於溫曜係至上海或勸士雄往就正士雄謝之號葉氏學者要以士雄爲巨擘惟喜用辛涼論者謂亦稍偏云

徐大椿原名大業字靈胎晚號洄溪江蘇吳江人翰林檢討鈺係生有異稟長身廣額聰強過人爲諸生勿屑去而窮經探研易理好讀黃老與陰符家言凡星經地志九宮音律技擊句卒贏越之法靡不通究尤邃於醫世多傳其異迹然大椿自編醫案惟剖析虛實寒溫發明治療之法歸於平實於神異者僅載一二其書世多有不具錄乾隆二十四年大學士蔣溥病高宗命徵海內名醫以薦召入都大椿奏溥病不可治上嘉其樸誠命入太醫院供奉尋乞歸後二十年復詔徵年已七十九遂卒於京師賜金治喪大椿學博而通注神農本草

經百種以舊注但言其當然不言其所以然採掇常用之品備列經文推闡主治之義於諸家中最有啓發之功注難經曰經釋辨其與靈樞素問說有異同注傷寒曰類方謂醫家判定傷寒論如治尙書者之爭洪範武成注大學者之爭古本今本終無定論不知仲景本論乃救誤之書當時隨證立方本無定序於是削除陰陽六經門目但使方以類從證隨方定使人可案證以求方而不必循經以求證一切葛藤盡芟去之所著蘭臺軌範凡錄病論惟取靈樞素問難經金匱要略傷寒論隋巢元方病源廣遺孫思邈千金方王叡外臺祕要而止錄方亦多取諸書宋以後方則採其義可推尋試多獲效者去取最爲謹嚴於疑似出入之間辨別尤悉其論醫之書曰醫學源流論分目九十有三謂病之名有萬而脈之象不過數十是必以望聞問三者參之如病同人異之辨兼證兼病之別亡陰亡陽之分病有不愈不死有雖愈必死又有藥誤不即死藥性有古今變遷內經司天運氣之說不可泥鍼灸之法失傳諸說並可取又慎疾蜀言爲溺於邪說俗見者痛下鍼砭多驚心動魄之語醫貫砭專斥趙獻可溫

補之弊諸書並行世大椿與葉桂同以醫名吳中而宗旨異評桂醫案多所糾正兼精瘍科而未著專書謂世傳外科正宗一書輕用刀鍼及毒藥往往害人詳爲批評世並奉爲善本同郡吳縣王維德字洪緒自號林屋山人曾祖字若谷精瘍醫維德傳其學著外科全生集謂癰疽無死證癰乃陽實氣血熱而毒滯疽乃陰虛氣血寒而毒凝皆以開腠理爲要治者但當論陰陽虛實初起色紅爲癰色白爲疽截然兩途世人以癰疽連呼並治誤矣其論爲前人所未發凡治初起以消爲貴以托爲畏尤戒刀鍼毒藥與大椿說略同醫者宗之維德兼通陰陽家言著永甯通書卜筮正宗

吳謙字六吉安徽歙縣人官太醫院判供奉內廷屢被恩賚乾隆中敕編醫書太醫院使錢斗保請發內府藏書並徵集天下家藏祕籍及世傳經驗良方分門聚類刪其駁雜採其精粹發其餘蘊補其未備爲書二部小而約者以爲初學誦讀大而博者以爲學成參考既而徵書之令中止議專編一書期速成命謙及同官劉裕鐸爲總修官謙以古醫書有法無方惟傷寒論金匱要略雜病

論始有法有方靈素而後二書實一脈相承義理淵深方法微奧領會不易遂多譌錯舊注隨文附會難以傳信謙自爲刪定書成八九及是請就謙未成之書更加增減於二書譌錯者悉爲訂正逐條注釋復集諸家舊注實足闡發微義者以資參考爲全書之首標示正軌次刪補名醫方論次四診要訣次諸病心法要訣次正骨心法要旨書成賜名醫宗金鑑雖出衆手編輯而訂正傷寒金匱本於謙所自撰其採引清代乾隆以前醫說凡二十餘家張璐喻昌徐彬張志聰高世祚張錫駒柯琴尤怡事具本傳其次者林瀾著傷寒折衷靈素合鈔兼通星象堪輿之學汪琬著傷寒論辨注魏荔彤著傷寒金匱本義沈明宗著傷寒金匱編注程應旂著傷寒後條辨鄭重光著傷寒論條辨續注周揚俊著傷寒三注金匱二注程林著金匱直解聖濟總錄纂要閔芝慶著傷寒開要編而遺書湮沒無考者尙六七家云

綽爾濟墨爾根氏蒙古人天命中率先歸附善醫傷時白旗先鋒鄂碩與敵戰中矢垂斃綽爾濟爲拔鐵傅良藥傷尋愈都統武拜身被三十餘矢昏絕綽爾

濟令剖白駝腹置武拜其中遂甦有患臂屈不伸者令先以熱鐵熏蒸然後斧椎其骨揉之有聲即愈覺羅伊桑阿乾隆中以正骨起家至鉅富其授徒法削筆管爲數段包以紙摩挲之使其節節皆接合如未斷者然乃如法接骨皆奏效故事選上三旗士卒之明骨法者每旗十人隸上駟院名蒙古醫士凡禁庭執事人有跌損者命醫治限日報痊逾期則懲治之侍郎齊召南墜馬傷首腦出蒙古醫士以牛脬蒙其首其創立愈時有祕方能立奏效伊桑阿名最著當時湖南有張朝魁者亦以治傷科聞朝魁辰谿人又名毛矮子年二十餘遇遠來乞者朝魁厚待之乞者授以異術治癰疽瘰癧及跌打損傷危急之證能以刀剖皮肉去淤血於臍府又能續筋正骨時有劉某患腹痛仆地瀕死朝魁往視曰病在大小腸剖其腹二寸許伸指入腹理之數日愈辰州知府某乘輿越銀壺山忽墮巖下折髀骨朝魁以刀刺之撥正傳以藥運動如常

陸懋修字九芝江蘇元和人先世以儒顯皆通醫懋修爲諸生世其學咸豐中粵匪擾江南轉徙上海遂以醫名研精素問著內經運氣病釋後益博通漢以

後書恪守仲景家法於有清一代醫家悉舉其得失所取法在柯琴尤怡兩家
謂得仲景意較多吳中葉桂名最盛傳最廣懋修謂桂醫案出門弟子不盡可
信所傳溫病證治亦門人筆述開卷揭溫邪上受首先犯肺逆傳心包一語不
應經法誤以胃熱爲肺熱由於不識陽明病故著陽明病釋一篇以闡明之又
據難經傷寒有五之文仲景撰用難經溫病即在傷寒中治溫病法不出傷寒
論外又謂瘟疫有溫有寒與溫病不同醫者多混稱吳有性戴天章爲治疫專
家且不免此誤著論辨之並精確有功學者懋修既棄舉業不求仕進及子潤
庠登第就養京邸著述至老不倦光緒中卒潤庠亦通醫官至大學士自有傳
王內字樸莊吳縣人懋修之外曾祖也著傷寒論注以唐孫思邈千金方僅採
王叔和傷寒論序例全書載翼方中序次最古據爲定本謂方中行喻昌等刪
取序例乃欲申己見非定論著迴瀾說爭之甚力又著古今權量考古一兩準
今六分七釐一升準今七勺七秒承學者奉以爲法呂震字櫟村浙江錢塘人
道光五年舉人官湖北荊門州判晚寓吳酷嗜醫診療輒有奇效其言曰傷寒

論使學者有切實下手工夫不止爲傷寒立法能從六經辨證雖繁劇如傷寒不爲多歧所誤雜證一以貫之著內經要論傷寒尋源懋修持論多本內震云鄒澍字潤安江蘇武進人有孝行家貧績學隱於醫道光初詔舉山林隱逸鄉人議以澍名上固辭澍通知天文推步地理形勢沿革詩古文亦卓然成家不自表襮所著書醫家言爲多傷寒通解傷寒金匱方解醫理摘要醫經書目並不傳所刊行者本經疏證續疏證本經序疏要謂明潛江劉氏本草述貫串金匱諸家說反多牽掣故所注悉本傷寒金匱疏通證明而以千金外臺副之深究仲景製方精意成一家之言費伯雄字晉卿與澍同邑居孟河濱江咸同間以醫名遠近詣診者踵相接所居遂成繁盛之區持脈知病不待問論醫戒偏戒雜謂古醫以和緩命名可通其意著書曰醫醕燬於寇撮其要成醫醕臚義附方論大旨謂常病多奇病少醫者執簡始能取繁不可尙異享盛名數十年家以致富子孫皆然

費伯雄所著詳於雜病略於傷寒與懋修澍宗旨並不

同清末江南諸醫以爲最著用附載焉清代醫學多重攷古當道光中始

譯泰西醫書王清任著醫林改錯以中國無解剖之學宋元後相傳臟腑諸圖疑不盡合於刑人時考驗有得參證獸畜未見西書而其說與合光緒中唐宗海推廣其義證以內經異同經脈奇經各穴及營衛經氣爲西醫所未及著中西匯通醫經精義欲通其郵而補其缺兩人之開悟皆足以啟後者

蔣平階字大鴻江南華亭人少孤其祖命習形家之學十年始得其傳徧證之大江南北古今名墓又十年始得其旨又十年始窮其變自謂視天下山川土壤雖大荒內外如一也遂著地理辨正取當世相傳之書訂其紕繆析其是非惟尊唐楊筠松一人曾文迪僅因筠松以傳其於廖瑀賴文俊何溥以下視之蔑如以世所惑溺者莫甚於平砂玉尺一書斥其僞尤力自言事貴心授非可言罄古書充棟半屬僞造其昌言救世惟在地理辨正一書後復自抒所得作天元五歌謂此皆糟粕其精微亦不在此他無祕本三吳兩浙有自稱得平階眞傳及僞撰成書指爲平階祕本者皆假託也從之學者丹陽張仲馨丹徒路士鵬山陰呂相烈會稽姜堯武陵胡泰微涪川畢世持他無所傳授姜堯注青

張輿語及平砂玉尺辨僞總括歌卽附地理辨正中平階生於明末兼以詩鳴
清初諸老多與唱和地學爲一代大宗所造羅經後人多用之稱爲蔣盤云
章攀桂字淮樹安徽桐城人乾隆中官甘肅知縣累擢江蘇松太兵備道有吏
才多術藝尤精形家言謂近世形家諸書理當辭顯者莫如明張宗道地理全
書爲之作注稍辨正其誤失大旨本元人山陽指迷之說專主形勢攀桂旣仕
顯不以方技爲業自喜其術每爲親族交友擇地貧者助之財以葬妻吳故農
家自恨門第微攀桂爲購佳壤葬其親擇子弟秀異者撫教之遂登進士第爲
望族高宗數南巡自鎮江至江甯江行險每山陸詔改通水道議鑿句容故破
岡潰攀桂相其地勢謂茅山石巨勢高縱成潰非設閘不可成儲水多勞費請
從上元東北掘山下鑿金烏珠刀鎗河故道以達丹徒工省修易遂監其役潰
成謂之新河百年來賴其利便攀桂亦因獲優擢大學士于敏中於金壇里第
築園攀桂爲之相度營建敏中歿後事覺高宗惡之視職居江甯晚耽禪理歿
時預知期日兼通日者術括協紀辨方精要爲一書曰選擇正宗行於世

劉祿河南人善風角

召直蒙養齋欲授以官屢辭從上北征會糧餉乏濟

命卜之曰不出三日

果如其言後從幸熱河一日踉蹌至宮門請上速徙

高阜以避水厄時丁晴霽夜山水漲發果衝沒行宮又善相人謂張廷玉史貽直皆異日太平宰相六十年冬乞假歸至十一月望日忽命家人制縗服北向哭未幾哀詔至正聖祖崩之後二日也後卒於家張永祚字景韶浙江錢塘人幼即喜仰觀五緯長通曉星學究悉天象年近三十督學王蘭生稔其學錄爲諸生閩浙總督嵇曾筠求通知星象者試永祚策立成數千言薦於朝授欽天監博士屢引見占候悉驗詔刊二十二史永祚校勘天文律歷兩志及書成告歸晚著書曰天象源委卒後有女傳其學堦沈度亦善推步守其書戴尙文湖南澧浦人諸生從鴻臚卿羅典學凡天官星卜諸書無不究覽嘗曰吾治經師羅先生吾術數未知孰可吾師者聞江南某僧精六壬奇門往師焉盡得其祕歸應鄉試長沙同舍生失金尙文爲占曰君金若干盜者青衣手魚肉前行後一白衣隨之肩荷重物以某時候驛步門外可獲也如其言往果驗嘗侍母

夜坐心動知偷兒入宅取井泥塗竈門書符封之偷不得去嘉慶初福康安征苗招致才異羅典薦激浦兩生一嚴如煜一即尙文謂曰嚴生負經濟才應祿仕汝疏散爲幕客慎勿官職自羈也尙文見福康安長揖不拜福康安欲試其術握絲帶問曰君神算知吾握中何物乃請一字析其數以五行推之曰絲縷耳大驚異禮遇之凡事必諮時苗猖獗恒夜撲營尙文輒預卜知之當五月進攻旗鼓寨占有大雹賊伏林莽師出不利勿聽日午將抵寨忽大風雷雨雹交下如卵如拳擊傷士卒伏苗乘之果敗軍中呼曰神仙又大軍在乾州營龍頭爲苗所圍斷水軍不得食尙文設壇鑿池以法禳之剽地清泉湧出四年駐天心寨尙文夜觀天象知有咎作書置幕府辭歸數日福康安遽卒尙文歸未幾亦病自知死日卒後其母傷之焚所傳書